

Nama : _____

Ting : _____

JENIS-JENIS AYAT

Ayat-ayat dalam bahasa Melayu boleh dibahagikan kepada empat jenis, iaitu ayat penyata, ayat tanya, ayat perintah dan ayat seruan.

1. Ayat Penyata

1. Ayat penyata ialah ayat yang diucapkan dengan maksud untuk menyatakan atau menerangkan sesuatu hal.
2. Ayat penyata juga dikenali sebagai ayat berita atau ayat keterangan.
3. Ayat contoh:
 - a) Pelajar-pelajar sedang mengulang kaji pelajaran di perpustakaan.
 - b) Normah tidak pergi ke sekolah pada hari ini.
 - c) Dia suka menonton rancangan televisyen.

2. Ayat Tanya

1. Ayat tanya ialah ayat yang digunakan untuk menanyakan sesuatu hal.
2. Terdapat dua jenis ayat tanya, iaitu ayat tanya tanpa kata tanya dan ayat tanya dengan kata tanya.
3. Tanda soal (?) diletakkan pada akhir ayat dalam tulisan.

(i) Ayat Tanya Tanpa Kata Tanya

1. Ayat tanya tanpa kata tanya ialah ayat yang diucapkan dengan meninggikan nada suara pada akhir ayat penyata.
2. Dalam tulisan, nada tanya ini ditandai dengan tanda soal (?).
3. Ayat contoh:
 - a) Adik masih belum makan?
 - b) Pemuda itu malas?
 - c) Bas itu sudah bertolak?

(ii) Ayat Tanya Dengan Kata Tanya

1. Ayat tanya dengan kata tanya ialah ayat yang menggunakan kata tanya seperti apa, siapa, bila, mana, bagaimana dan sebagainya.
2. Ayat contoh:
 - a) Barang itu apa?
 - b) Pemain piano itu siapa?
 - c) Hari jadi kamu bila?
3. Dalam bentuk tulisan, ayat-ayat tanya ini perlu menerima partikel "-kah" dan diletakkan di hadapan ayat.
4. Ayat contoh:
 - a) Apakah barang itu?
 - b) Siapakah pemain piano itu?
 - c) Bilakah hari jadi kamu?

3. Ayat Perintah

1. Ayat perintah ialah ayat yang digunakan untuk menimbulkan sesuatu tindakan.
2. Ayat perintah terdiri daripada empat jenis, iaitu:

a) Ayat Suruhan

Penggunaan Ayat Contoh

Ayat Suruhan Memberi arahan atau memerintah seseorang membuat sesuatu.

1. Minumlah teh ini dahulu.
2. Siapkan kerja sekolah ini.
3. Fikirkanlah sebelum bertindak.

b) Ayat Larangan

Melarang seseorang daripada melakukan sesuatu.

Menggunakan kata larangan seperti jangan, usah atau tak usah.

1. Jangan petik bunga itu.
2. Usah bermain di tepi jalan.
3. Tak usah kau campur tangan dalam hal saya.

c) Ayat Silaan

Menjemput atau mempersilakan seseorang

Menggunakan kata silaan seperti sila atau jemput.

1. Sila beratur sebelum masuk ke dalam kelas.
2. Silalah pakai topi keledar.
3. Jemput makan bersama-sama.
4. Jemputlah datang ke rumah saya.

d) Ayat Permintaan

Memohon permintaan dan pertolongan.

Menggunakan kata permintaan seperti minta atau tolong.

1. Minta tuan-tuan dan puan-puan mengambil tempat duduk masing-masing.
2. Minta anda semua bersabar.
3. Tolong ambikan saya secawan air.

4. Ayat Seruan

1. Ayat seruan ialah ayat yang digunakan untuk melahirkan perasaan seperti takut, marah, gembira, sakit, benci dan sebagainya.
2. Tanda seru (!) biasanya diletakkan pada akhir ayat seruan.
3. Ayat seruan didahului oleh kata seru seperti amboi, wah, eh, oh, aduh, cis dan sebagainya.
4. Ayat contoh:
 - a) Amboi, cantiknya gadis itu!
 - b) Wah, mahalunya baju ini!
 - c) Oh, aku lupa bawa wang hari ini!

LATIHAN

1. Tentukan jenis ayat dalam setiap ayat yang diberikan sama ada **ayat penyata, ayat tanya, ayat perintah** atau **ayat seruan**.

(i) Dia gembira kerana berjaya mendapat tempat di institusi pengajian tinggi. _____

(ii) Jemput masuk ke rumah hamba yang usang ini. _____

(iii) Bagaimanakah kemalangan feri yang melibatkan 200 orang penumpang itu berlaku?

(iv) Sila masuk, maaf rumah saya berselerak sedikit. _____

(v) Amboi, cantiknya baju Kak Ton hari ini! _____

(vi) Murid yang melanggar peraturan sekolah akan didenda. _____

(vii) Mengapakah kamu lewat sampai ke sekolah? _____

(viii) Jangan bermain bola di tepi jalan raya. _____

2. Baca ayat – ayat perintah di bawah dengan teliti. Kenal pasti ayat – ayat tersebut dan klasifikasinya sama ada ayat – ayat itu **ayat sila, ayat suruhan, ayat larangan**, atau **ayat permintaan**.

(i) Awak siapkanlah kerja itu sekarang. _____

(ii) Tidak usah kau ambil tahu akan hal aku lagi. _____

(iii) Sila buat laporan tentang kejadian tersebut di balai polis yang berdekatan. _____

(iv) Tolong hantar jawapan sebelum hari Sabtu. _____

(v) Engkau tunggu dia di rumah. _____

(vi) Jemput datang ke majlis perkahwinan anak saya. _____

(vii) Belajarlah rajin-rajin untuk Berjaya dengan cemerlang. _____

(viii) Usah membuang masa dengan sia-sia. _____

(x) Minta semua murid memberikan perhatian. _____